

TOKYO, Isnin — Timbalan Perdana Menteri, Dato Seri Dr. Mahathir Mohamed berkata hari ini, Malaysia ingin mencontohi dayausaha dan dedikasi orang-orang Jepun serta bagaimana negara itu mem bangunkan ekonominya untuk menjadikannya sebuah negara perindustrian dan pertanian yang dinamik.

Bellau menegaskan, rakyat Malaysia ingin mempelajari dari Jepun dan rakyatnya tentang kemahiran teknik, kemahiran pengurusan dan kepakaran pemasaran untuk mencapai tujuan ini.

Dato Seri Dr. Mahathir yang juga Menteri Perdagangan dan Perindustrian yang mengetuai rombongan penggalakan pelaburan ke Jepun berucap di pembukaan persidangan bersama tahunan Persatuan Ekonomi Malaysia-Jepun (MAJECA) dan Persatuan Ekonomi Jepun-Malaysia (JAMECA) di dewan perniagaan dan perusahaan binaan Tokyo di sini.

Katanya, Jepun merupakan satu simbol kesungguhan kerja dan dedikasi terhadap negara yang boleh dikatakan tidak mempunyai sumber-sumbernya sendiri.

Sebaliknya, Malaysia pula berazam menjadi sebuah negara contoh sebagai sebuah negara membangun yang mengamalkan sistem demokrasi dan ekonomi bebas.

Dato Seri Dr. Mahathir berharap MAJECA dan JAMECA akan lebih menekankan soal penggalakan pelaburan bagi mengadakan projek-projek usahasama di Malaysia yang boleh mendatangkan faedah bersama.

Katanya, penubuhan perbadanan-perbadanan usahasama akan dengan sendirinya membawa peningkatan perdagangan, hubungan sosial dan kerjasama ekonomi antara kedua negara.

Malaysia ingin contoh dedikasi Jepun: Mahathir

Katanya, Kerajaan Malaysia berharap sektor swasta sama ada dari luar atau dalam negeri akan dapat memainkan peranan yang dinamik dalam usahausaha membangun ekonomi dan perindustrian negara.

Bellau berkata, "Dalam segi ini kami mengalu-ngalukan ahli-ahli perniagaan, pelabur dan pemegang wang Jepun untuk bersama-sama kami dalam usahakami mewujudkan sektor-sektor pertanian dan perindustrian yang moden dan dinamik di Malaysia."

Timbalan Perdana Menteri itu berkata, sungguhpun Malaysia dianggap sebagai mempunyai ekonomi yang berasaskan sumber-sumbernya ia berharap menjelang tahun 1990, sektor perkilangan akan dapat memberi sumbangan yang terbesar

kepada keluaran dalam negeri kasar (KDK).

Di bawah Rancangan Malaysia Ketiga yang ada sekarang, kira-kira \$10,000 juta dijangka akan dilaburkan oleh sektor swasta dalam perusahaan perkilangan.

Kira-kira \$3,000 juta daripada jumlah itu adalah dijangka dalam bentuk pelaburan swasta asing.

Bellau berkata, Jepun sekarang merupakan satu kuasa ekonomi yang terbesar di dunia.

Bagaimanapun, tampaknya, Jepun tidak bercita-cita untuk menjadi "imperialis ekonomi."

Sebaliknya, tampaknya, Jepun dan ahli-ahli perniagaan Jepun telah memilih untuk bekerjasama dan sama-sama menikmati faedah daripada usaha yang telah berjalan bertahun-tahun dengan negara-negara seperti Malaysia.